

# 150 peserta sertai Dialog Borneo Kalimantan Ke-11

NST 29. 6. 13 7

LABUAN: Seramai 150 peserta menyertai Dialog Borneo Kalimantan Ke-11 yang berlangsung di Wilayah Persekutuan Labuan yang bermula kelmarin hingga 30 Jun ini.

Peserta tersebut mewakili Sabah, Sarawak, Brunei, Kalimantan, Semenanjung Malaysia dan tuan rumah Wilayah Persekutuan Labuan.

Majlis perasmian disempurnakan oleh Ahli Dewan Negara, Senator Datuk Yunus Kirus merangkap Pengerusi Majlis Penasihat Perbadanan Labuan di



LANCAR .... Yunus (empat kiri) melancarkan buku Antologi Puisi Dialog Borneo Kalimantan.

Dewan Utama, Universiti Malaysia Sabah, Kampus Antarabangsa Labuan (UMSKAL) malam Khamis lalu.

Turut hadir Ketua 1 Gabungan Persatuan Penulis Nasional (Gapena), Datuk Wira Prof Dr Abd Latif Bakar dan Ketua Pengarah Dewan Bahasa dan Pustaka (DBP), Datuk Dr Awang Sarian.

Hadir sama Pengarah UMSKAL, Prof MadyaDr Ismail Ali, Ketua 1 Persatuan Penulis Wilayah Persekutuan Labuan (Perwila), Dr Harun Pudin dan Pengarah Jabatan Pelancongan, Kebudayaan dan Kesenian, Perbadanan Labuan, Mahathir Abd Hamid serta Ketua II Gapena, Datuk Zainal Abidin Borhan.

Dialog kali ke-11 2013 itu dianjurkan Gapena, DBP, Perbadanan Labuan dan Perwila.

Dalam ucapannya, Yunus berharap dialog tersebut dapat memaut dan merapatkan lagi silaturahim serta jalinan mesra antara peserta yang sedia terjalin supaya memudahkan penganjuran acara sastra, bahasa dan budaya di Kepulauan Borneo ini.

Beliau juga berharap segala hasil perbincangan melalui pembentangan makalah yang ditulis cendekiawan akan mencetuskan beberapa resolusi yang akan menjadi pemangkin dan perjuangan dalam mengem-

bang, memartabatkan bahasa, sastra dan budaya Melayu di rantau ini.

Pada majlis itu, Yunus turut mencadangkan penubuhan cawangan Jabatan Kebudayaan dan Kesenian Negara dengan menambah unit bahasa dan sastra untuk mengembangkan lagi kegiatan sastra dan bahasa di Wilayah Persekutuan Labuan.

"Kehadiran peserta dari Kepulauan Borneo diharapkan mampu memantapkan bidang sastra dan bahasa serta budaya di kepulauan ini pada masa akan datang sekaligus mengeratkan lagi hubungan silaturrahim yang sedia terjalin antara rakyat dan kepimpinan negara," katanya.

Majlis perasmian itu diserikan dengan persembahan tarian SMK Pantai dan Badan Budaya Perbadanan Labuan serta iringan pemuzik Perbadanan Labuan.

Pada majlis itu, Yunus turut melancarkan dua buku Antologi Puisi Dialog Borneo Kalimantan dan buku antologi 'Sepulau Sekasih Kita' edisi kedua.

Ketua Pengarah DBP, DrAwang Sarian menyampaikan ucapan d'asar sempena Dialog Borneo Kalimantan Ke-11 2013. - Oleh Jainudin Djimin (jainuddin@newsabahtimes.com.my)